




閩媛典第一百十四卷

閩烈部列傳七十

皇清二十

吳光辰妻謝氏

按建寧府志謝氏政和人吳光辰妻夫死於賊姑令改適氏自殺

丘參妻周氏

按建寧府志周氏崇安人丘參妻參死慟哭幾殞姑苦勸以食踰月遺腹生一

女氏抱棺號泣曰夫雖棄我我敢負夫乎不食數日死

王初石妻黃氏

按建寧府志黃氏崇安人王初石妻石貧爲父行役溺死氏聞哭幾絕遺腹

生子撫之及三歲爲薙髮氏拜夫靈遂自刎太姑亟救不及啟其梳匣得詩曰常說死同穴怎

忘生共衾夜泉難負約一劍託貞心時年二十遠近咸作詩輓之

童先聲妻范氏

按建寧府志范氏崇安庠生童先聲妻值寇亂被掠不屈罵賊投河死

丘世蕃妻倪氏

按建寧府志倪氏崇安丘世蕃妻康熙十六年值寇亂避居下東坑六月三

十日寇臨其地被逼弗從大罵不絕遭慘害

劉昌仁妻張細娘

按建寧府志張細娘崇安人劉昌仁妻年二十一爲賊所掠逼之氏叱曰

我自有夫不受污也賊挾之以刃益厲聲曰吾頭可斷腹可剖身不可辱罵不絕口遂遇害

游月清

按建寧府志游月清政和人君正女年十四以美色聞於里中賊欲圖之圍其室月

清抱幼弟潛匿水碓下聞呱呱聲蹤跡之殺其弟逼月清不從遂遇害

嚴志振妻王氏

按甌寧縣志王氏嚴志振妻振福清人流寓甌寧年二十四夫亡止遺一子

矢志鞠之踰年一子亦喪王悲痛賦十嘆詩親設酒醴祭姑暨夫端坐自縊而死

施端宋

按甌寧縣志施端宋國綱女流寓甌寧幼誦內則諸篇年十五議配諸生林玉子長

培未嫁培歿女聞訃辭父母易服至林視培目猶未瞑慟哭撫之解巾自縊於側髮中有一紙

書云受聘女端宋雖與郎未合誓不可無別我死另置一棺耐葬康熙二十七年建坊旌表

阮蔭娘

王尋妻

按臺灣府志阮氏蔭娘本漳州人父操舶爲業年十六適王尋尋同安人貧不

聊生寄身行伍氏歸未幾尋伯兄沒伯姒棄遺腹子別適氏撫之如己出尋尋亡其仲兄某偕妻遠來哭尋氏請所撫姪爲夫後仲許之夜靜仲姒就寢氏卽自縊家人救甦自是防甚密氏

恐不得遂給妣曰吾嘗縊甚苦今不敢爾時或佯笑語不復過爲哀慟妣以爲信防稍疎既卒哭又乘隙就縊妣急救泣慰曰叔死不可復活何自苦氏曰誓不獨生得遂同歸之願足矣仲使人隨之不離氏乃醉之以自脫嚴妝投繯死時康熙二十年

梁佐卿妻關氏 按廣東通志關氏梁佐卿妻年二十三歸梁事翁姑孝二十五夫亡無子父母欲嫁之氏以死誓紡績貞守糟糠不飽甘之如飴康熙癸卯鄉遭焚劫賊至以白刃逼偕行氏罵曰吾節婦惡賊乃敢辱我賊怒殺之鄉人無不墮淚

張氏女 按廣東通志張氏女父康侯早沒母蘇氏鞠之甚苦女生而孝謹幼許同里莊之信信病亡女聞訃哀痛欲奔喪母不許女晝夜悲泣水漿不入口母強之食已而食不下咽未幾而死

朱氏七烈 按廣東通志朱氏七烈者南海朱協蓮妻妾女婢也海寇掠蓮家蓮妻盧氏被執罵不絕口飲刃而死蓮妾周氏李氏婢張繡雲幼女尾姑俱以盧死憤罵同斃賊手蓮長女十姑年十七細姑年十六賊挾之渡海二女並號泣奮身赴海賊拽之旋以頭觸賊刃賊怒殺之

羅世賢妻鍾氏 按廣東通志鍾氏番禺庠生羅世賢妻賢居承宣街夫亡孀居二十餘載事翁姑極孝庚寅大兵入城氏投井死時年六十二

馮亞斗妻潘氏 按廣東通志潘氏新會馮亞斗妻歸馮週歲事姑以孝聞甲午李定國困城守兵糧缺掠民爲食其夫臥病呼母妻語曰變至此卽康強且不免況如我者乎與其葬凶殘腹中孰與自死母妻哭慰之乃自強起碎廚戶爲薪潘泣曰夫行婦隨吾敢惜死乎偵姑已睡夫婦舉火自焚同室救之不得次早檢闔火堆惟兩心不燼而已

王命召妻滕氏 按廣東通志滕氏靖藩下王汝庫子命召妻命召隨征病亡氏哀慟不食七日死夫婦年俱十六康熙十三年靖南王題請旌表奉

旨建坊

方馨娘 按廣東通志方馨娘東莞河田人文學方鉉女八歲許聘文學陳龍駒子澄如康熙癸丑年甫及笄陳子歿歿馨娘矢志從死至冬月夜半換白衣固紉投水死遠近哀之陳母迎其柩合葬

陳婦阮氏 按廣東通志阮氏田家婦夫陳姓不知其名生未嘗知姆訓康熙三年奉

旨徙瀕海居民流離乏食其夫挈之託身牛錄舒雲虎家爲奴任耕作居邑城東門外一子一女皆幼夫死阮方有娠旁皇哀號已念身爲人奴又少艾若戀戀諸孤勢不自全乃決志殉夫往從主人翁乞錢以殯既葬閉戶自縊鄰媼救之勸慰曰卽不愛生奈諸孤何且又未挽也阮唯唯他日撫其二孤曰吾不能爲汝計矣遂投水死

彭媚女 按廣東通志東莞貢生彭媚女賦性貞靜許嫁御史尹明翼孫滋康熙庚戌滋弱冠病亡女聞訃號慟擗踊幾絕或議擇壻曰有死無二勸祝髮則又曰誓不爲尼父母不得已許往視殮伏屍哭盡哀殮畢守喪不歸與滋生母胡氏形影相依撫育嗣子鬻簪珥以營滋葬地未幾病却藥嘔血而死死復甦數日與家人訣乃瞑目而逝與滋合葬

許康策妻陳氏 按廣州府志陳氏新會人許康策妻康熙初新寧賊首鍾吉伍生世喜甄叅相擁衆圍劫其鄉氏夫被殺舅姑及家人俱擄禁陳氏不受辱大罵奪刀自刎死

黃震妻鍾氏 按廣州府志鍾氏南海人黃震妻夫早亡子幼家貧孀居十七年康熙己酉土

下今圖書集成
賊刼之下船逼汚氏嚼舌噴血罵賊不絕口賊磔殺之

梁伯仁妻黎氏 按順德縣志黎氏梁伯仁妻仁死無子翁姑歿氏年二十六苦節守義康熙

甲辰海賊刼其鄉氏倉皇逃難賊追迫抱石自沉死

梁亞喜

蘇氏梁亞蟾閩明附

按順德縣志梁亞喜年二十值海賊披猖鄉村危急諸母曰賊充斥奈諸

女何喜答曰有死而已無畏也甲辰歲盜攻其兄梁簡侯樓喜在焉樓將破喜墮樓而死其姊亞蘭已適何因避亂回家亦墮而死同時生員梁錫蓮妻蘇氏及烈女梁亞蟾年十八梁閩明年二十俱罵賊不絕口被殺

陳改娘 按順德縣志陳改娘生員陳宗謙女年十六未受聘甲辰海賊刼其鄉偕弟避難賊漸逼氏遂投大江死

盧尙雍妻鄭氏 按香山縣志鄭氏庠生盧尙雍妻康熙甲辰海寇掠其鄉尙雍與父母妻子皆被執母衰病不前賊棄之鄭氏方襁負其子度姑可幸脫卽解釋其子於地目送姑姑乃攜孫歸鄭死不隨賊賊曰我釋汝後復有執汝者第隨我去可贖汝翁與夫鄭氏曰非所計也遂

觸石而死

陳昌昆妻梁氏 按香山縣志梁氏菁山村陳昌昆妻康熙三年春海寇入村昌昆父子被執賊持刀逼氏隨往氏不從引頸受戮賊殺之

歐帝祐 按清遠縣志歐瑛女名帝祐許嫁某氏康熙元年將親迎被賊刦去不受辱爲賊所殺

彭氏二女 按連山縣志彭氏二女父鏜澄邁縣訓導康熙五年流賊入境二女同時被執堅拒不辱言不絕口爲賊所殺邑令旌之

楊徽勳母陳氏 按乳源縣志陳氏生員楊徽勳母大賊曹營刦縣因大水不能過河遂攻楊家圍臨破氏卽自縊死

李光亨妻張氏 妾劉氏附 按翁源縣志張氏生員李光亨妻與妾劉並被賊擄義不受污共投崖死縣令李上林旌之

林萬壽妻沈氏 按翁源縣志沈氏生員林萬壽妻賊破圍見氏佳冶強欲污之氏罵賊不屈

死縣令李上林旌之

王應會妻陳火姑 按歸善縣志陳火姑邑諸生王應會妻歸寧途次鹽埕礮遇大蓬盜被擄不爲所污次日盜回營經赤沙渡火姑自舟中奮身入海死

陳年姐 按歸善縣志鐵爐湖叔冠女許嫁邑庠生李花結歲丙戌定婚期至九月寇陳耀入據縣城年姐懼爲所污密縫其衣以羅帶自縊死

潘氏女 按長樂縣志潘氏女年十六未嫁城破被執欲污之至死不從賊懼以刃女益奮罵奪刀自殺賊恨支解其屍

陳阿戌妻張順娘 按海陽縣志張順娘海陽下底鄉人年十七適鶴塘陳阿戌事翁姑以孝謹稱居家勤恪夫妻相敬如賓一日阿戌入叢竹中樵薪薄暮不歸其父執炬往尋已爲虎啖盡惟頭顱背骨在林莽中順娘走拾殘骸遍舐其血抱之號慟旋入室割喉垂死姑救甦守之母至慰諭再三謂曰兒年少好境尙多何苦爲此順娘大呼曰此語非所願聞已辦一死何事多言以戌平日衣器雜物盡納其棺中齋醮懺悔資死者冥福括其簪珥指環僅得兩餘付翁

襄事翁不忍用醺畢躬負土以葬留旁穴相待母辭歸慰諭益懇順娘曰兒從此無回頭日矣
次夜二鼓竟縊死於牀時康熙癸丑二月也康熙二十二年奉

旨建坊旌表

鄒永福妻鍾氏 按程鄉縣志鍾氏邑民鄒永福妻年十八歸鄒貧甚日事紡績夫婦熒熒子
立氏有姿色里屠黃伺夫出詐事挑之氏正色閉門夫歸告之夫輒然以刀授妻曰再來有刀
在次日夫出氏續如故屠至遽奪其刀曰汝真不從殺汝猶殺一猪也手摩其乳氏右手持棍
左手捉衾瞋目大罵曰鼠賊吾頭可斷吾身不可辱欲殺卽殺屠遂殺之夫歸報縣縣令典史
往驗見氏捉衾持木狀儼然若生坐榻不仆典史捕獲黃賊對尸杖之尸方顛遂斃屠於獄籍
其產爲氏供祭立廟祀之表其門時康熙六年

許乃振妻張氏 按埔陽縣志張氏許乃振妻年十七歸許甫一載夫勤學山中受濕致病兩
足不能動履氏朝夕舉案甚謹康熙丁巳夫遭回祿死氏自近採藥聞夫變奔回仰天哀號曰
夫死吾豈獨生時火方烈氏卽投火共燼

梁指妹 按高要縣志指妹處士梁迴清女生而聰敏嫺閭訓許嫁周頌頌少補邑弟子員年二十未婚而沒妹聞訃素衣號哭白父母欲奔喪不可設位晨暮痛哭至明年頌死之日妹哭訖盛飾登樓自縊死歸其柩與頌合葬旌表

梁象震妻余氏 按新興縣志余氏生員梁象震妻避亂寓居大隱村山賊焚劫氏被擄不辱適傍有魚池奮入池死

李昌運妻何氏 按德慶州志何氏庠生李昌運妻昌運死欲以身殉屢爲母阻時方亂潛逃有強暴乘亂威劫之何據刀厲聲曰此刃可蹈吾身不可污若輩乘危傾人天當不若宥也遂自刎

溫月嬌

陳氏附

按德慶州志溫月嬌溫和鼎女世亂避地三洲爲羣盜所執嬌語嫂陳氏曰可

死不可辱也嫂許諾遂相攜觸石而死

孔宗堯女

按德慶州志孔氏貢生孔宗堯女少許知縣吳語論次子語論攜子宦遊四川遇

難不返女誓志不字會某官以事遣卒執堯女不及避爲健卒見歸自悔曰吾何當露面爲鼠

輩熟視耶留此清白身歸泉下也遂絕粒死

郝熙女 按合浦縣志郝熙女許聘儒士黃朝熙遭兵逃散朝熙流落異省有遊擊王繼學子王韜聞郝女容貌絕倫遣兵子持聘金擲其家適朝熙回鄉訂期迎親韜倚勢奪之女知父一貧儒難與抗衡遂自縊

王大年妻陳氏 按靈山縣志陳氏王大年妻河南人康熙二年大年任靈山縣丞甫兩月而沒陳痛夫泣血殮畢卽自縊死邑令義之命合葬東門郊外隨僕二人感其節烈尋皆痛悼而死

陳總兵妻曾氏 按靈山縣志曾氏湘潭人總兵陳某妻寓於靈年少而艷其夫被賊殺於橫州博合墟氏聞厚賂購屍殮殮成禮約三七後以身殉慕其姿者百計誘之不應預懸一練於樑置備棺衾經理後事屆日召諸鄰婦飲各相餽別家人老幼分班生祭畢乃易妝自酌俗名曰吃上路飯拜夫靈柩從容自經

許耀斗妻陳氏 按瓊州府志陳氏澄邁北橋人同知陳時政曾孫女大同府同知許汝都仲

子耀斗妻也年二十夫病亡僅一女歸依母家矢志不嫁會歲大祲餓殍塞道氏母度難存活欲奪其志私爲受聘將娶前一日氏知之抱女慟哭給之出遂自縊死

程演妻韋氏 按定安縣志韋氏程演妻性貞靜明達義理閨門里戚無間言遭黎賊之變擄氏不行賊褫其衣氏厲聲罵曰身可殺而衣不可褫時有稚女在抱料不能免乃置於道傍賊復逼之嚙唇噴賊遂被殺暴露二日顏色如生夫及鄰里潛伏山林目覩其事賊退合衆殯葬聞者無不傷感

徐氏何氏 按貴州通志徐氏盧龍妻何氏龍鼎妻俱郡人亂兵逼城二婦恐污俱自經死康熙九年旌其閭

江婦柯氏 按貴州通志柯氏閩人寓鎮遠適江氏子生一女夫溺死柯聞擗踊哀號誓不欲生翁姑多方慰之終不可解乃爲築臺柯辭翁姑別女伴赴臺受親屬祭畢其女牽衣涕泣留之從容語女曰婦人未嫁從父既嫁從夫夫死從子吾夫死無子殆天喪我也遂自經

敖氏二女 按貴州通志敖氏二女父鳴雷與兄啟宗妻張氏皆同郡人寇至挈家避地後洞

中賊緣巖至知不免姑嫂並結襟投巖死郡守姜登高上其事學使旌之

詹倖祿妻吳氏 按貴州通志吳氏詹倖祿妻蠻彝司人賊兵亂氏避難孫巖山兵至度不免

投巖死巖高數十仞肢體不損顏色如生人咸異之

李氏三女

周氏田氏附

按貴州通志李氏三女父承春同母姊妹也與嫂周氏及外姊田氏皆同

郡人賊兵追急恐辱同墜巖死學使旌之

江氏女 按貴州通志江氏女父之鴻永寧普市所官女年十六未字遭亂被掠不辱自經死

康熙三年旌表

任尊德妻敖氏 按貴州通志敖氏貴陽人任尊德妻事姑及祖姑盡孝夫歿氏年二十三子

賢甫一歲撫養成立襲朗溪司副長官值僞兵潰亂氏避箐中不食而死

邵堯章妻陳氏 按貴州通志陳氏邵堯章妻安化人爲兵掠去被迫攜兩幼女投江死

葛氏女 按貴州通志葛氏女父應啟許字王若陵未嫁而陵亡女聞不食死

潘奎妻吳氏 按貴州通志吳氏新貴人明經吳和修女年十六適鎮西庠生潘奎六年而奎

亡遺子四歲復殤吳曰不卽隨夫地下者爲此兒今復何望其母聞往視之默無一言闔三日給其母寢漏下三鼓悉取平日澣衣著之投繯而死及母覺氣已絕矣

冉國輔妻張氏 按貴州通志張氏冉國輔妻安化人賊兵縱掠氏竄洞中被獲度必受辱投崖死

楊郁妻何氏 按貴州通志何氏楊郁妻修文人夫客死普安何以死自誓家人防之何伴爲談笑慰其姑防者稍懈乃解帶自縊康熙十年巡撫佟鳳彩旌其門

牟婦李氏 按貴州通志李氏適牟氏子遇難自刎從人急救奪其刃喉未絕以手斷之而斃楊昌裕妻劉氏 按貴州通志劉氏楊昌裕妻安化人年十八爲僞兵所執死之

時際明妻王氏 按雲南通志王氏千戶時際明妻趙州人郡廩生王曰都女年二十與夫及舅姑避兵於楊柳沖順治末爲賊所執自揣不能脫引刀刎頸血噴賊衣觀者無不流涕康熙元年巡撫袁懋功具題旌表

陸萬頃妻楊氏 按雲南通志楊氏太學生陸萬頃妻趙州人性剛烈順治末年賊兵猝至避

不及引廚刀自刎顏色如生康熙元年巡撫袁懋功具題旌表

楊朝棟妻蘇氏

按雲南通志蘇氏諸生楊朝棟妻趙州人廩生蘇溶女順治末年避兵於莊

西穴中爲賊所逼不辱而死康熙元年具題旌表

盧惠妻甯氏

按雲南通志甯氏盧惠妻惠爲思州經府銅苗攻城甯投河死旌表

吳伯祐妻張氏

按蒙化府志張氏吳伯祐妻年十九沙逆破城被掠不從賊殺其乳子終不

從以頭觸刃賊怒殺之

周興祚妻楊氏

楊氏高氏附

按雲南府志楊氏周興祚妻事翁姑至孝相夫有禮戊戌之歲避亂

於石壁村氏年少方姪謂興祚曰事急矣妾懼不免願以一死釋君累興祚泣曰爾一死則殞二命盍避之氏曰妾固知其必不能免也奚避爲遂潛入室自縊死其弟婦楊氏姪婦高氏從之康熙丙午呈請旌表

白應科妾馬氏

按雲南府志馬氏白應科妾陝西漢中府人賦質幽閒操行貞潔康熙二十

二年應科任雲南按察使馬隨之官科遭疾危篤馬親嘗湯藥衣不解帶科卒哀痛拒食投繯

死年二十二有司事請表其節

施堯心妻龍氏

蔡氏金氏朱氏金妹海長劉氏婦周氏婦段氏婦傅氏附

按雲南府志龍氏施堯心妻戶部郎合川孫女

歸施七年而寡寇入滇龍與媳蔡氏金氏孫媳朱氏女金妹孫女海長闔門自縊又有前妻女

劉氏婦姪女周氏婦段氏婦姪婦傅氏皆同時自縊死人稱施氏十烈

王起鳳妻張氏

按富民縣志張氏縣民王起鳳妻年二十餘適鳳甫一載鳳病淹臥日久張

侍湯藥不倦及亡張痛哭自縊死

許純臣妻謝氏

按富民縣志謝氏貢生許純臣妻賦性端潔善事翁姑戊戌潰寇搶掠氏慮

不免泣謂子曰好從爾父吾不能復顧矣言訖自刃而死

丘允元妻徐氏

按宜良縣志徐氏生員丘允元妻徐允聘女年二十二夫亡遺孤僅二歲族

人逼改節氏自斷一指示志撫孤二十餘年大兵臨省潰寇四出氏投巖死康熙五十四年學

使旌之

顧連城妻王氏

按嵩明縣志王氏顧連城妻楊林人城溺水死氏年二十二號慟欲絕聞夫